

四庫全書

集部

欽定四庫全書

集部
四明文獻集卷三

詳校官庶吉士_臣張溥

主事_臣呂雲棟覆勘

覆校官中書_臣汪師曾

校對官監丞_臣張曾炳

謄錄監生_臣沈成均

欽定四庫全書

四明文獻集卷三

宋 王應麟 撰

表

代皇子謝賜御書孝經十六句表

詞科第二場
丙辰二月

十三日

始予事親終予事君
口無擇言身無擇行

滿而不溢高而不危
天之經也地之義也

德義可尊作事可法
通于神明光于四海

居則致敬養則致樂
進思盡忠退思補過

伏蒙聖慈賜臣御書孝經十六句者睿謀垂裕夙承父

訓之嚴神畫疏思備舉聖經之要因心立教拭目知榮
臣某惟夫子之發微言為曾參而陳孝道首述君親之
事謹始及終復虞富貴之移戒危與溢身行口言之無
失天經地義之兼該事可法德可尊表裏俱正居致敬
養致樂造次弗違神明四海以交孚進退一忱而匪懈
有倬飛鸞之翰於昭詒燕之謀二八句之特書撮其樞
要千萬人之咸悅始於家邦仰倣邇英之屏俯殊制旨
之注矧熙朝資善之學肇祥符丙辰之春詔儒臣而讀

是經錫宸章而刊諸石游觀洪藻宏賁前猷某德媿溫
文性慙岐嶷出有師入有保蚤齒虞庠親則父尊則君
恪遵周寢曩者分封之渙號誨之全孝以移忠旨趣會
于五經未闕聖蘊德教加於百姓徒仰皇明載觀河洛圖
書之光如親洙泗問答之語茲蓋恭遇皇帝陛下學稽
古典筆寓天常祚嗣萬年受祉而施於子冠冕百行得
手而應於心約漆簡千有餘言洒驪珠六十四字淳化
祕丘之刻祖武可繩紹興方國之頒人文增煥臣敢不

聿嚴琰寫式廣家藏仁孝製六章之詩遠邁唐公之賜
札夙夜事一人之訓緬思建邸之陳圖臣無任

按詞學指南云表明也標表也標著事序使之明白三
王以前謂之敷奏秦改為表漢羣臣書四其三曰表不
需頭上言臣某言下言誠惶誠恐稽首頓首左方下附
曰某官臣甲乙上陽嘉元年左雄言孝廉先詣公府
文吏課牋奏又胡廣以孝廉試章奏然則章奏試士其
始此歟唐顯慶四年進士試關內父老迎駕表開元二
十六年西京試擬孔融薦
禰衡表則進士亦試表

代侍講說書官為經筵進講孟子終篇謝賜金
帶牙簡同侍講修注官謝賜祕書省御筵及

鞍馬香茶進詩表 詞科所業

臣某等言華光講藝備觀亞聖之書蓬省賜筵並錫多儀之寵感鴻恩而播詠瞻丹袞以颺言竊以漢帝論經虎觀侈賜衣之渥唐宗嚮學瀛州疏給饌之榮意皆寓於隆儒禮特豐於接下矧軻書之眇指傳孔道之正宗由義居仁七篇之言靡不載垂憲詒後百世之王莫能違於穆熙朝若稽丕訓祖禹闡明於元祐表臣敷繹於紹興逮聖神尊德以有為於問學逢原而自得細旃晝

訪聆責難陳善之規我弁星環探知性盡心之蘊華編
甫徹謏聞奚裨疇侍言誦說之勞暨著記纂修之職鏐
輦絢采復頌象齒之珍玉笋示慈咸綴麟臺之席上駟
式調於沃轡團龍交架於奇芬稽古所蒙省躬莫稱歸
美以報拜手載歌贊智聖之大成述君臣之相說辭陳
約禮遠晞積翠之篇句寫賜賡俯效集仙之飲退慙斐
墨曷對闕休茲蓋伏遇皇帝陛下居安資深守約施博
存神過化與天同流明物察倫取人為善覽大賢之論

集興盛治之雍熙德醉從容秩太清之華晏幣將舄奕
邁宗政之儀文臣等識媿寤疑恩霑同樂讀古書而尚
友諒懷望道之思頌清廟以致平期盡正君之義臣無
任

代宰臣以下賀奉安光宗皇帝寧宗皇帝寔訓
寧宗皇帝經武要領今上皇帝玉牒日厯會
要禮成表

臣某等言文謨武烈並揚二后之休漢典唐經叅著一

王之法森寶儲而日揭絜縟禮以星陳竊以監先憲求
多聞商書垂範有常德立武事周雅紀功迨開成標帝
籍之名暨魯史謹策書之體至若觀會通而行禮尤先
撮機要以舉綱茲萃進於一時宜輯成於五典允哲光
皇之揖遜於昭寧考之儉勤燕翼詒謀焜耀億萬年之
訓鴻猷復古堅凝三十載之規有嚴論述於史筵申命
纂修於宥密天啟離明之治日新貴象之文治嫩化於
登三煥鴻猷於襲六瑤編溫潤金匱閎嚴繫日繫時裒

嘉熙淳祐之紀注有倫有要粹實紹端平之憲章討裁
分飭於羣儒尊閣載差於穀旦韶鈞烜烜羽衛歲蕤絢
繅采以辰儀瞻冤旒而執讀事該經緯備清覽於邇英
瑞集圖書肅秘藏於廣內恭惟皇帝陛下心傳精一學
懋緝熙道德風烈之庶幾邇追來孝制度紀綱之能永
勿替歷年功光祖宗政布方策率彝章而由舊據行事
以鑒新文武大畧舉焉聖而繼聖禮樂庶事備矣書不
一書臣等欽覲聲明欣逢熙洽始於勤而治內外願駿

惠於閔摹祓厥文而作春秋嗣鋪張於偉蹟臣等無任
按此以上三篇蓋公詞科試中暨所業者觀其措詞立
意前後次第豐贍鎮密信所謂法度之文也近世文章
之士能為麗語者甚多而識制作之體者絕少故其空
疎繆戾有終身弗悟者矣若此三篇者宜表而出之以
為矜式

宰臣以下賀明堂禮成表

明堂孔陽秩九筵之盛典聖人能饗申億載之宏休慶
洽神人歡騰宇宙

中賀

竊以接三才之奧嚴將禮于季

秋宣二祖之光協初郊於先甲物

闕

備有成之告民和

皆至治之馨若昔燕貽自今駿惠恭惟剛健中正悠久
光明更化而福祿來迓續肇基之運修政而境土復恢
宏再造之規觀其會通悉於上下農扈奏屢豐之瑞邊
陲凝耆定之勛精意以程裒時之對在宮在廟觀盥之
薦有孚于帝于宗泰元之策復始又時暘若德與氣游
前星重七鬯之暉華景粲璧珠之象緝熙純嘏安樂太
平永命而不歷年陳常于夏敷言而錫保極有澤如春
於赫漢儀以篤周祐臣等幸叨顯相欣覩熙成式典靖

四方願進夙夜畏威之戒奉觴上曼壽聿觀癸亥宗祀

之祥

按景定四年九月公自台州通判召為太常博士故事即禮部官草百官箋表博士禮部郎屬也

宰臣以下請度宗聽政第一表

景定五年十月

四海遏音遽

闕

遺弓之慕百官承式有嚴嗣服之初跂

望清光肅循大卞恭惟聰明時敏聖知日躋龍樓庶務之參聞灼知政體虎闌三善之兼得允協人心祇台德先迪從子保問安視膳冀文考之復初遺大投艱痛周家之降割未堪多難永言孝思然而色之戚哭之哀已

乎興望朝以聽夕以訪難曠繁機即位五始以體元踐祚三日而端冕惟哲作則示民有尊伏願遙駿先猷勉遵中制法宮親事乾首物而萬國寧司士詔儀德如辰而衆星拱

第二表

天眷命以為君誕膺傳序王眎朝而聽治艱執過哀未拜詔俞渚陳衆籲若稽前聖之述作莫盛有周之纘承綴衣於庭既延元子而入翼室奉珪魚幣乃告諸侯而

出應門豈於禮經以或違蓋欲邦彝之早正百篇軌範
萬世法程恭惟位履剛中體乾純粹南陽辨牘臣民知
參決之機東序隆儒問學得修齊之要繼文下武戴舜
同心嗣德在初靡替億萬年之敬奉先思孝必勤一二
日之機黎元遂而後應之志深氛祲清而豫防之慮在
聆王言而稟令瞻皇極以近光詎以宅憂稽於聽事訪
落率昭考之始如見羹牆輯瑞覲羣牧之儀益嚴堂陞

第三表

十一月

離兩繼明屢祈蒞政巽重申命未忍行權深知聖學之
純恪守禮經之正再三有瀆億兆同辭於皇祖宗丕紹
基緒內極哀痛於中禁外臨聽斷於治朝蓋擢慕發於
中忱而觀瞻係於南面仰惟先帝奄棄羣臣痛切烏號
愴道揚於審訓謀詒燕翼望開釋於至情亦念萬機之
繁用垂億載之裕恭惟心舜文之與合躬曾閔之所難
麻冕黼裳思不忘於繼序飭食蔬服敬欲盡於事親顧
肇允集蓼之初有悠哉未艾之慮臣下罔攸稟令夙夜

莫不遑寧闢門達聰無待畢三年之制總綱明任是惟
迪前人之光

第四表

萬邦仰照如日之升三請執謙于帝其訓達孝永言於

承考微忠

闕

回天疊冒威嚴冀攸俞旨惟元儲之

御極自至道之詒謀

闕

勉徇羣臣之奏西序眡

事靡逾六日之間蓋禮制之從宜念時幾之久曠哀未

忘也俯而就之恭惟清明在躬濬哲稽古致敬光四海

不肅而成初服命歷年克謹厥始欲報之德遠省若勤
矧修攘敷遺於丕謨而繼述可淹於庶務惟休惟卹有
節有權伏望俯鑒輿情仰循舊典釋康王之冤喪期無
改於內庭垂虞舜之裳朝位聿新於南向

第五表

知臨大君之宜羣心丕徯孝思下土之式四詔如初匪
敢咸諫於王亦曰節情以禮竊惟倫制在乎兼盡經權
可以並行未有命戒而居廬難遵滕國繼猶泮渙而謀

廟必監周詩今敬通於神明且哀發於言語是亦為政
顯若有孚矧導訓受瑁之初俾聽法服繚之後考作室
既底法毖我成功朝至是用和民所其無逸克紹先烈
惟懷永圖慈良於喪倘未正路朝之位既降厥士亟當
循便殿之儀伏願寅念燕詒於昭龍造即齋居而決事
新聖化以承休福威惟辟之尊四方來賀公卿奉職以
奏庶績其凝

第六表

眡朝周典聿觀治化之新易月漢儀難執亮陰之舊五
下明詔一哉聖心仰思慕之無窮繇敷陳之未至以喪
與易寧戚雖致其哀禮因情為文必知所節練冠而親
機務素幄而見臣隣古有行之時則可矣放諸四海而
準孝已感於德元至於萬年惟王本寔關於初政體訪落小
毖之意躬天保采薇之勤豈必端憂乃為繼志伏願昇
於衆感稽若邦彛昭德以照百官副玉几遺音之託正
純而法五始衍寶龜申命之休

第七表

天作之君飛龍利見日致其孝隙駟易流若三年惟不言則萬事懼有闕謙冲已過震越靡寧竊以上聖每惜寸陰治象皆觀挾日副大歷服無恙恤成功受羣臣朝乃考圖敷賁此作新民之美化亦付有家之初心丕顯孝皇祇承高廟執喪固踰舊禮蒞政靡越旬時迪前人先為後世法恭惟英姿絕武粹學察倫方袞集燕謀敷言是彛是訓念紹膺駿命無彊惟休惟艱遽臨舊貫之

居水懷罔極之感哀難為繼德何以加伏望益廣堯聰
少釋舜慕人道自始聽宜務於五先生者常行節願參
於四制

按公本傳度宗即位攝禮部郎官草百官表舊制請聽
政四表以上一夕入臨宰臣諭旨增撰三表公操筆立
就丞相言搃還辭位表三道使者立以俟公從容授之
丞相驚服即授兼禮部郎官其載公敏捷如此以上七
篇即宰臣諭旨增撰者觀其萃諸經史為一家言而變
化開闔有如自然所謂不期於工而自工者真自早年
嘗讀其文至於成誦終不能髣髴其萬一而近世士大
夫上書朝廷欲禁絕偶儷其亦不思甚矣烏乎使士大
夫習為偶儷盡如公之
為表亦何害其為文哉

請御正殿第一表

孝思維則勉旻政於內朝謙尊而光未詔儀於南面古
有當陽之義今逾易月之期祇率彝章肅陳忱籲竊以
聖作物覩大明生東廡遠堂高衆星拱北漢即位而坐
前殿周報誥而出應門惟在德元以為民極恭惟恪守
堯喪之制丕承舜典之傳禮根於心治指諸掌璧帛之
召登崇譽髦絲綸之言拊勞邊戍鑒無逸而却貢獻體
訪落而廣詢謀得於視膳問安之時形為繼志述事之

美猶且對羣臣於素幄覽庶物於清箱匪昭名分之嚴
曷聳華夷之望伏願鼎新百度臨照萬方黼坐衣裳法
春秋而居正紫宸闔闔參天地以宅中

第二表

小臣求助聖化維新大昕眡朝邦儀由舊未回聰聽冒
貢愚忠竊聞當宁所以答陽踐祚先乎謹始若稽至道
之要洊更朔旦之期蓋閭外之治斷恩禮弗敢過而天
下之本在國分有常尊亦越淳熙於昭達孝謂德報罔

極靡行漢制之權宜臣言屢陳勉從周誥之彝訓恭惟
繩其祖武察於人倫保右命之永惟堂構之托陟降庭
止優若羹牆之思非但致哀於宮中將以顯式於宇內
然布黃朱之乘容衛必嚴倣泰紫之居等威攸繫丕應
徯志於救圖功元首明庶事康有赫乾飛之造清風發
羣陰伏共瞻履正之光

第三表

豐勿憂宜日中蓋循禮節離重明化天下丕顯君尊百

命未俞一忱固請竊以久文先帝祗適前猷宅恤永懷
暫居便坐奏章三上並御昕廷嚴著定以訓官常肅廉
陞以隆國勢昔既勤止無替歷年今帥行之克施有政
恭惟就將典學聰哲冠倫眈朝遵孝祖之謨情所未忍
繼序篤成王之敬思且不忘儼素鞞之過哀豈黼依之
為樂惟體元而立制乃揚烈以覲光三朝受圖則必臨
周之路寢正月輯瑞則必親舜之法宮嘗瞻穆穆之容
願釋皇皇之慕仰承昇付首庶物乘時龍俯示表儀使

萬民觀治象

請上乾會聖節名第一表

咸淳元年正月

天生上聖丕昭震夙之符月在正陽允叶乾嘉之會善
治聿來於福祿大德必得於壽名宜新鳳紀之編式表
虹流之度竊以仁皇御極如歲之春炎祚融暉發祥維
夏若稽資始之義用彰命哲之初昔以元長人於穆不
已今以亨合禮申錫無疆恭惟剛健粹精居行聚卞儲
英潛躍肇乘時於六龍膺運文明期咸寧於萬國闡河

圖而毓瑞承祖烈以重光臣工奉觴忻千載之一遇侯
衛執贄浹四方之大和輯詩雅歸美之忱贊易象為君
之體既多受祉于永保民臣等不勝大願謹以四月初
九日為乾會節伏望俯鑒輿情仰遵徽典南山獻祝薰
風載詠於舜絃北闕臚歡湛露普沾於周澤著之令甲
副在有司

第二表

德行以健萬年惟王禮覩其通四時合序取文言而歸

美稽憲典以抒忱溫詔弗俞愚忠洊瀆竊以書陳無逸
之壽詩頌長發之祥粵若熙朝廸惟茂典太平纘服標
令節於乾明隆興御圖表昌辰於會慶繼今述作復旦
光華恭惟貽哲在初體元立制中正備太陽之粹盡屏
邪陰亨嘉輯一氣之和肇新治象凡化原之謹始皆易
學之儲思福欲錫民名宜賓實尊為天子舜其孝申命
用休請祝聖人堯曰辭允恭克讓然虹電既昭於符瑞
而川嶽來效於貢珍倘曠上儀曷彰盛際伏望丕從衆

志祇適舊章班百僚之玉觴雖未展容於漢殿錄千秋
之金鑑庶幾伸諷於唐臣

第三表

受命丕若歷年自今初服嘉會足以合禮與時偕行尚
執一謙敢陳三祝竊以九重龍御握乾符稽帝文億載
燕詒法仁祖至天德適觀舊典祇奉洪名既粹毓以紹
圖必體元而致治生生之謂易近取諸身巍巍其成功
克昌厥後恭惟緝熙聖學駿惠先猷立太平基運神心

於博化開衆正路培善類於始亨惟性得陽明之純而
政著日新之美宜參至健永保太和匪介祉之溢辭乃
願忠之微悃伏望式篤周祜亟定漢儀夏見曰宗輯四
方之來賀皇建有極衍萬壽之無疆

第四表

堯辭三祝未賜俞音虎拜萬年蓋循彝典惟聖意達事
親之本在微忱伸報上之恭謙尊而光禮時為大竊以
乾行四德莫以盛夏之亨節紀千秋匪曰開元之舊若

稽隆古丕顯宏休必得壽名中庸之稱舜孝篤生保祐
大雅之詠嗣徽億載繼承二儀明察恭惟有陟降率昭
考之志有怡愉奉太后之心致永慕於諒陰遠迪淳熙
之訓表誕彌於長樂近參寶慶之規所謂盡制而盡倫
斯可教敬而教愛然念尊君之義盍嚴即祚之初始於
家邦備訪落思齊之美申以福祿協鳧鷖既醉之詩矧
嘉會之欣逢斯羣情之共戴願符善頌亟詔有司翼室
興懷徐展紫宸之賀慈闈介祉聿先金鑑之陳從答是

期竭忱以請

是日兼攝翰苑撰允批答

理宗靈駕發引慰皇帝表

龜筮協祥既飭因山之禮龍輶整駕難淹同軌之期六
紼天行萬方雨泣恭惟紹休聖緒永言孝思致敬致哀
放諸四海而準畫倫盡制定為三年之喪愴禹穴之將
臨僣堯塋之如見願承先志少抑至情

慰皇太后

仙鼎登天烏號永慕壽原卜日龍駕遂行四海攀摧六

宮哀慘恭惟侔月久照協坤無疆周雅保佑之功敷遺
翼子唐室怡愉之奉用懌慈顏願遵順變之言少紓追
遠之感

慰皇后

穀林卜吉遠日倣臨葆衛戒嚴溥天胥慕恭惟順承聖
孝式副婦儀周寢問安尚想龍樓之入禹山再竊愴聞
鳳翼之行柔衷諒切於哀恫衆志願祈於寬釋

靈駕至攢宮安寧慰皇帝表

仙馭在天肅漢陵之仗衛經涂如砥屈禹會之山川靈
旆燕寧瑞氣葱鬱恭惟緝熙於學慈良於喪翼翼厥德
不回孝思惟則皇皇如望弗至明發有懷四方來觀萬
年其永湯沐歸沛既安高寢之神羹墻見堯願釋舜心
之慕

慰皇太后

羽翹有嚴奉厥儀而肅若川塗不聳次靈域以安然帝
鄉之佳氣如初鼎湖之仙遊寢遠恭惟功參厚載德茂

思齊近願漢官愴福寧之猶舊隄瞻禹會慨永穆之維
新願紓哀戚之悰式燕怡愉之養

慰皇后

珠丘蒼野仙仗安行玉座黃陵神游來燕萬靈拱侍七
萃肅扶恭惟篤棐民彝明章婦順輔佐聖王之孝諒極
慕思怡愉太母之顏願言開釋

謝賜御製牧民訓表

倬彼雲章懋昭彝教爾惟夫牧誕保受民一札星垂四

方風動竊以舜典咨於上日厚德允元周政炳於席常有司是訓此帝王攸行之慮寔造化日生之心皇矣熙朝率時丕範紫雲樓宴具發撫養之片言化成殿書不忘安樂之二字戒日詩之簡切守官箴之坦明亦越先皇於穆永命仁厚著論春噓露濡廉刑作銘日揭霜凜肆燕詒於奕葉式駿惠於宏謨恭惟躬禹儉勤性堯文思惟天既付疆土至于萬年御事越在甸侯若茲多誥凡曰之屏之翰飭以如家如身聖人情見於辭對時茂

育邦伯念敬我衆致告自今臣分竹承休求芻蕘瘁二千石謹養勉爾稱職之良五皇極近光恪奉敷言之正

謝賜御製牧民銘表

乾元長人培億年之邦本巽重申令放一札之仁言倬彼為章嚴惟丕式臣聞大君宗子以民為天有司牧民於帝其訓肅若舊典光垂休銘太宗述膏脂之規著存戒石理考著廉刑之儆敷錫臣工聖藻標乎日星皇澤深乎雨露凡在商畿周屏之列恪遵湯盤武席之謨一哉

王心鑒於先憲謂戚忻之繫命繫爾守臣如痛癢之切身時予德意曰惠多誥其勅懋和昭回奎壁之纏永久
甸侯之範恭惟文思稽古清明在躬廣虞舜元日之咨
遠邇無間法藝祖紫雲之戒撫養為先寵綏而作之師
教告而至於再勉哉祇命陋開元愛人之詩共此惟良
軼本始夙德之詔寫諸琬琰佩若韋弦臣敢不勤毖官
常欽承宸指山東布漢令咸知惻怛之忱天下誦堯言
益謹寅清之職

進御製石刻摹本表

堯仁天覆煥乎文章漢札春溫詔於郡國賁飭昭回之
藻巽申牧養之言書紳祇佩於宸謨寫琰冒陳於乙覽
恭惟聰明寬裕剛健輝光相帝以綏四方閔民而惠多
詰紫雲樓嚴藩侯之儆率循藝祖之規選德屏列守臣
之名聿駿孝皇之典雨露至教日月羣心訓敕皇極之
義銘參戒石之刻越小大邦用勸垂億萬年無疆臣宣
化罔功承休有恪念嘉師之保受懋顯命之對揚貫虹

氣於山川寅仰清光之近盼龜書於奎壁肅登副墨之藏

賀皇太子賜名進封建國名表

多男授職保命自天貽命在初封建厥福宗祊景鑠宇
宙頌聲恭惟學懋察倫仁深垂裕寬厚祇承於駿惠覃
訐有衍於燕謀立愛而始於家嚴惟丕式受祉而施於
子錫以嘉名謙冲循半子之規震長迪中興之典臣跡
縻東土心拱北辰欣聆赤社之策書阻預彤墀之班賀

本支百世載歌令聞之詩祚衍萬年益邁太平之雅

進功德疏謝獎諭表

堯封獻祝恪共臣職之常漢闕疏榮敷賁思言之獎對
揚焜耀祇誦凌兢竊以億載登太平與天齊壽十行賜
方國細書成文貌如微臣欣際嘉會伏念某久濡雨露
假守甸畿寬詔屢班寅奉好生之訓頌聲允洽肅將歸
美之忱便蕃宸指之褒烏奕侯邦之寵誤承茂渥曷稱
隆私茲益恭遇聖敬日躋聰明時又華芝三萬歲於昭

昌熾之符大椿八千秋有衍怡愉之慶聆忠規於金鑑
介繁祉於玉觴既推育物之仁復厚遇臣之禮臣敢不
益塵宣布欽佩睠知千里溪山胥樂風薰之阜九霄綸
綍仰瞻虹采之光

代賀改元寶祐表

寶龜申命延洪必世之休鳳歷更元迓續丕平之運風
雷鼓舞日月光華竊以漢武改元朔之名適當癸亥之
歲孝宣攸地節之詔越在壬子之年或即舊而鑒新或

懼災而應變孰如昭代稽若先猷恭惟睿知有臨嚴恭
自度更化善治三十年政教之清燕翼貽謀億萬年基
圖之永睠言歲紀已浹星終將順華以明時爰體乾而
首物儉慈為寶永底烝民之生保佑自天庶幾二祖之
烈嘉名有倬竚命惟凝某幸際泰亨聳聆孚號法春秋
而謹始敢貢愚忠與士夫而勵精欽承德意

代賀皇子忠王行冠禮表

寶祐二年

上聖詒謀茂毓成人之德初陽展采肇稱冠冢之儀華

夏臚歡宗祊錫羨竊以十五志於學備禮所以正容萬
億年之休重本在於敬始鋪觀舊典莫盛祥符元袞介
圭錫命甲寅之歲華纓綦弁筮辰令月之冬適駿有聲
克開厥後恭惟體元首物立愛始親慶垂萬世之基教
予必以禮樂忠為百行之寃稽古建爾國家睦言復七
日之剛卜協震洊雷之長主于尊屬酌開元太極之曩
賓以輔臣軼五鳳孟春之詔有儀可象爰字孔嘉重耀
宣光盼璧珠於紫極三加薦醴節金石於黃鐘受周祉

之無疆卜漢儲之早定天廸從保邦永孚休臣越在邇
藩頌聆懿鑠既冠而明有敬奚煩賈誼之規會邸而稱
無雙莫預黃香之列

擬國史院進光宗寧宗實訓表

盛帝重光垂百王之丕式大君繼序輯二典之宏規萃
篇目而臚分晉嚴闕而露奏竊以大禹貽孫之則著在
夏書武王燕翼之謀播於周雅允鑠兩朝之懿於昭載
籍之傳光宗皇帝適駿有聲嚴恭自度剛健以新其德

躬覽政機精一而執厥中心傳道統寧宗皇帝始終典
學玄默化民無怠無荒三十年之享國曰慈曰儉六五
帝以匹休作者聖述者明顯哉謨承哉烈豐功懋德編
之詩書美政嘉言布在方策天開累洽日闡大猷抽金
匱之缺遺裒蘭臺之紀載粵若紹熙之嗣服施於嘉定
之守成任賢修己之遠謨立武攘夷之要畧寫之琬琰
炳若丹青主善為師恢至道示軌範有條不紊揚洪烈
章緝熙冠周史之寶書軼楚臣之訓典寅上西清之御佇

嚴東壁之儲恭惟志篤昭功治隆繩武念茲皇祖鑒成
憲以無愆迪惟前人式歷年而勿替適追來孝率又斐
羹法二后之不敢康作一藝而摘罔極用訓丕德其永
孚休臣等載筆非長總綱有媿承明登進又新天聖之
盛儀大清覽觀願舉寶元之故事

代先君謝賜御書竹林汲古傳忠六字表

淳熙
十一年

晝日接三承金華之殊渥帝書策一駭圭窬之榮觀鳳
函飛下於九霄虹采輝流於六瑞窺文有耀拜況祇欽

竊以德星之題嘉孝友之為士法飛白之賜美忠節之
贊皇猷咸因書圃之娛用錫儒纓之寵矧聖學根原於
六藝而宸章冠冕於百王若至和詞林之書申褒邇列
昔淳熙石湖之翰敷賁舊儒詎圖螢爝之微亦覩龍鸞
之妙伏念臣學慙淇澳節慕放芹經術淺蕪異綆泉之
深汲聖聰密勿思牖約之納忠將為予張書紳之規敢
效劉洎登牀之請銀鈎揆藻寶軸舒華燈然衮宇之褒
粲若珠組之麗顧瞻榆景猶夜燎之對朝陽捧玩蓬簷

駭褐衣之被明月仰佩隆儒之睠共夸稽古之榮茲蓋
恭遇淵懿冠倫緝熙顯行覽盤銘而敬德日新又新悟
筆諫以飭躬心正則正堯文有煥羲畫入神循太清羣
玉之羹徧延義邇英之彥肆昭回之下飭殆誦說之未
陳臣敢不紹衣德言對揚休命日月光華復旦幸瞻卿
靄之祥山海時節來朝永寶宸奎之秘

代先君謝賜御製周易徹章詩表

淳祐十三年

寶跗揆藻寫羲畫之粹精翠琰垂芳備虞廷之賡載輝

騰奎壁榮被簪紳若稽皇朝深造易學便殿述乾元之
剛健成均陳泰道之感通祥符製三章而示儒臣紹興
書二卦而賜宰輔洪惟上聖允迪前猷朋來益助之龜
日新其德惠浹濡闕之燕情見乎辭發陰陽闔闢之機
播日月光華之詠穗書再刻瑤軸俯盼恭惟極深研幾
精義致用蓄天在山中之德學懋緝熙渙風行水上之
文心潛經緯聖醞達志筌之妙宸章昭鏤玉之傳於赫
賁觀敷同晉錫臣胄無色線袖有驪珠七言屬和於栢

梁莫陪俊彥百詠輯成於離正徒仰文明

代進放生池御札摹本奏

久道化成配天其澤好生德洽與物為春焜耀十行涵
濡萬彙於穆仁皇之盛治聿嚴景祐之聖謨湛露宴飲
之儀自奉有節行葦忠厚之意各得其宜肫肫發育之
仁永永鴻長之福恭惟命凝鼎正德體乾元瑞紀流虹
茂膺必得壽之祉愛存避蟻益普欲並生之恩恐朋酒
殺羔之傷和景正旦放鳩之示惠推此一念宜於億年

臣祗覲奎光肅登琰刻廣充仁術願探孟子之忠摹寫宸章敬上真卿之頌

代賀皇子加兩鎮公主進封昇國表

寶祚申休昭格乾坤之貺璿源䟽渥式符震巽之亨慶輯宗祊光增簡冊竊以漢封帝子兼國十城周重王姬下后一等未有跼鄂聯輝之盛誕膺絲綸並命之榮雙節建旄貽遠謀於燕翼大邦徹土協佳氣於龍蟠爰章稽列聖之傳美號取陪京之舊匪直親親而賢賢用彰

蟄蟄以繩繩恭惟學粹察倫德深垂裕主器莫若長蚤
諭教以正名立愛始於家成肅雖而流諏克昌厥後載
錫之光百世本支衍繇陟穰華之祉萬年祚嗣軼猗蘭
仙李之芳臣幸玷觀風欣聆渙號宜民假樂願歌石命
之章占夢斯干遂致中興之治

代知舉謝賜御札表

三紀移風丕闡文明之化十行賜札聿求經濟之才天
藻昭回時髦興起竊以熙朝稽古進士設科開寶宏規

親試否臧之下慶歷盛際通考策論之長無競維人有
常立武萃強本折衝之彥凝理內御外之功大哉王言
監於先憲訓辭深厚煥有三代之風俊良登崇庶幾二
祖之烈飭迨司而決擇廣多士之蒐羅祇聆絲綸咸知
標準茲蓋恭遇道行恒久德運乾元菁莪之澤既深采
薇之治尤重籌邊體國將因言而察能尊主庇民俾由
學而致用明謨所迪美習維新臣敢不精以掄才公而
率屬選士考寔行復觀儒效之真得賢立太平益迓王

圖之永

擬賀郊祀禮成進詩表

萬年敬休方茂成王之德上日肆類率循虞帝之初乾
端坤倪之燕娛月御星驅之鷄吉嘉氣液洽洽象融明
昔孝祖乾道之元行郊禮孟春之朔欽柴而美光燭奠
胙而慈顏愉維清文典肇禋思皇多祐於赫湯孫奏假
申錫無疆恭惟聰明宅中仁儉自度恭默三祀在宮在
廟不顯亦臨兢業萬幾治內治外於神可告乃殷薦於

豫順乃孝享於萃亨多士駿奔走而佁從四方大和會
而來祭蕭脂以興嗣歲黼黻以歌青陽作蒐禰宮登奉
徽冊用騁太室肆裸鬯圭芳扈泰時之觚壇肸飾甘泉
之鹵簿瓊案皇邸繭牲桂尊燿火舉而澹高旂瑄玉奠
而熙純嘏翠鳳迴軫金雞舒恩簇仗正太極之朝簪花
介長樂之壽袞時之對惟聖為能臣幸扈屬車肅瞻釐
席正月見祖奏元和億載之詩千春獻祥續臣甫三禮
之賦

代饒禮侍謝太中大夫表

自天有命甫玷貳卿累日為功亟躋四品被絲綸之溫
厚增筆素之光華維聖朝優法從之恩同漢制易諍臣
之秩以德詔爵建官維賢如臣戇愚奮蹟塵俗小宗伯
之職濫綴攝承列大夫之官退安留滯會課雖逾於七
載計勞無補於萬分忽末路之際逢越常塗而登進若
稽在昔尤重此階賈誼草儀爰錫超遷之寵申公議禮
乃膺即拜之榮皆褒異於宏儒俾討裁於鉅典臣何能

者心竊媿焉仰窺訓迪之猷俯極滿盈之懼恭惟聖神
天運剛健日新煥帝堯之文章百工熙績明成周之黜
陟八柄馭臣將磨厲於人才用恢張於治具肆放茂渥
匪曰曩規臣敢不精白承休靖共好直諷諭盡忠孝勉
企前修典禮觀會通願裨美化

代玉牒洪兵書謝成轉通議大夫表

事書於策效韓筆之鋪休言出如綸拜漢廷之增秩三
長無取四品有榮竊以史莫嚴於寫琰之藏德莫盛於

鏤玉之述在祥符則安仁立精簡之例在嘉定則章穎
裁刪潤之規凡懋賞於汗青必服勤於副墨如臣者學
慙寔用世沐殊恩承先人之舊聞竊希遺直奏從臣之
薄技敢與斯文春秋一辭之未能日月末光之難寫傳
言虎觀仰帝學之緝熙倬值鸞坡聆聖謨之深厚舉宏
綱而紀寔申景鑠以告成然總綱維碩輔之功纂輯乃
羣臣之助臣何力之有命錫紫泥今稽古所蒙階升黃
散寵光特異駑鈍奚勝恭惟剛健日新聰明時又倬彼

周王之壽考敷遺燕謀煥乎帝堯之文章丕揚鴻烈立
政堅於金石作政儷於璠璣與史並驅編詩書而無媿
奏篇稱善示軌範而可行登崇峻宇之儲帛奕褒章之
渥臣敢不肩忱報上佩訓教忠近臣盡規倘可通於末
議王度如玉願無怠於太平

代洪兵書謝表

武部隳班屢自天而有命文章率屬未滿歲而為真摶
分僥踰承恩兢惕竊以國有六職司戎獨省文書天生

五材明政必及閒暇方采薇之治小愒而徹桑之備有
嚴元祐息兵用蘇軾詞章之彥乾道復古召黃中耆艾
之儒是以道德成乎安強名實加於上下如臣末學敢
跂前修翰墨非長叨世掌絲綸之美弟昆迭進愧才皆
經緯之稱粗守樸忠躡居華貫俎豆之間未學軍旅承
攝無虞甲兵之問不至廟堂簡稽何補久已羞於展屨
俄正秩於夏卿帝有思言循墻靡獲官皆民譽竊位是
慙欽哉訓迪之明懷若滿盈之懼共惟行周法度勅舜

時幾假有廟以除戎益謹不虞之戒尊上帝而顧俊灼
知常任之臣攘夷先政事之修強本多雋英之進顧令
迂懦亦預褒升臣敢不精白承休靖共好直既莫遂蔡
謨之遜再登納言願恪勤程伯之官復歌常武

代謝華文學士知寧國表

夏卿曠職甫從南晦之耕虞閣通班驟假左符之寵霜
露皆至人之教乾坤本生物之心全度恩深孤危分溢
伏念某才非濟美任適逢辰叨世掌於絲綸奚施潤色

積歲遷於曳履無補論思顧竊位以已羞願推賢而報
效臣心如水難自信其靡他考槃在阿盖久知於宜去
矧嬰衰疾屢控忱辭陳力不能難違春秋之責奉身而
退幸回日月之光念朝陪入說之聯迺夕下出藩之詔
宛陵山水之郡懷紱有榮太微奎壁之躔遺簪罔棄詳
試於外式華其歸省躬滋懼於異升申命莫逾於頻異
恭惟知人則哲聽德惟聰設禮義遇其臣隆褒盡下無
黨偏會有極觀過知仁睠累牘以祈閑弁一麾而從欲

臣誓堅晚節期報春暉汲黯田園弗任淮陽之治子牟
江海敢忘魏闕之忠

冬至賀表

陽剛七日復亨見天地之心聖壽億年泰元增甲子之
筴祥開霄極慶決震區恭惟寅畏嚴恭高明悠久合八
音於律呂和以致和齊七政於璧珠旦兮復旦對履長
而有慶行乾健以無疆某欣際昌辰敬裒嘉頌光依漢
殿相百辟之奉觴歡動唐宮詠五紋之添線

甲子上元新漢儀之候景天正長至儼唐殿之受朝瑞
靄九霄歡騰四海恭惟躬行乾健心玩復爻俊乂登崇
見陽剛之懋長慶垂靖謐知陰慝之潛消邕協氣於埏
埴等睿齡於翼翼某叨躬麟定肅遙鵠行億載萬年申
祝後天之算五紋六琯共陶化日之和

景定五年咸淳元年兼沂清忠

王府
教授

露布

晉前鋒都督平寇青州露布

詞科試擬進卷

尚書五兵臣玄等言臣聞天下之義當混為一我伐用
張仁人之兵所存者神無遠弗届迪上帝命付中國民
徐方既同而來庭宣王復古齊地悉平而振旅世祖重
光整我六師如雷霆植十二部之旗鼓不圖今日載纘
武功恭惟皇帝陛下體乾粹精位履中正凝江寧神靈
之祚至於萬年開吳分歲星之祥綏以多福有方行海
表之畧無宴安江沱之心惟氏鞠凶至堅孔熾吞燕涼
而薦食介鱗易我衣裳闔州益以長驅蠹賊荒我居圉

敢行稱亂不戢自焚師克在和雖武騎無所用天助者
順聞風鶴皆為兵一戰成淝水之勲三捷取陽壽之境
匹馬騎輪無反乃滅而亡簞食壺漿以迎曰徯予后謳
吟思漢震動附周臣安請乘破竹之機分命采薇之率
復舊都在此行也清四海可失時哉臣等以先啟行敷
奏其勇辟四方徹我土誕將天威獎三軍定中原剪此
朝食推鋒而造渦潁抗旌而次彭城彗掃星流席卷雲
徹欲快心於狼望庶舉秦若鴻毛虓虎濯征困獸猶鬪

張崇守兗河而假息符明據書社以全生食堪靡懷寢
薪莫悟矧河南城堡之皆附寧山東德化之未孚乃遣
劉襲攻郵城崇棄甲而遠遁復俾高素向廣固明因壘
而來降穆如清風丕冒出日齊變至魯魯變至道載戢
干戈汶達於濟濟達於河底謹財賦遂鼓行於司豫汜
盪戰於羌髳時靡爭而心載寧君之訓而臣何力斯皆
帝德廣運聖武布昭歸鄆謹田用儒無敵揚文武烈圖
功攸終予以正六龍御天之居豈止保一馬渡江之緒

臣等共武之役賴天之靈洛邑朝諸侯望翠華之回軫
營丘發嘉號族玉牒之修封臣等無任慶快激切屏營
之至謹遣某官奉露布

按詞學指南云露布之名始於漢漢制詔三公皆璽封
尚書令印重封露布州郡祭祀志注引東觀書有司奏
孝順號露布奏可又鮑昱詣尚書封胡降檄曰故事通
官文書不著姓又當司徒露布李雲露布上書注謂不
封也魏改元景初詔曰司徒露布咸使聞知蜀漢建興
五年春伐魏詔曰丞相其露布天下凡皆非將帥獻捷
所用遷典云後魏攻戰克捷欲天下聞知乃書帛建於
漆竿上名為露布自此始也王肅獲賊二三皆為露布
韓顯宗有高曳長縑虛張功捷之譏孝文稱傳修期下
馬作露布齊神武破之山軍為露布杜弼即書絹不起

草唐制下之通上其制有六三曰露布兵部侍郎奉以奏聞集羣官東朝堂中書令宣布張昌齡為崑山道記室平龜茲露布為世所稱于公異為招討府掌書記朱泚平露布曰臣既肅清宮禁祇奉寢園鐘虞不移廟貌如故德宗咨歎焉東晉未有露布隆興初以晉破苻堅命題似有可疑然文章緣起曰漢賈洪為馬超伐曹操作而魏志注謂虞松從司馬宣王征遼東及破賊作露布隋志有魏武帝露布文九卷世說云桓溫北征令索熙倚馬前作露布手不輟筆俄成七紙則魏晉已有之
王元之擬李靖平突厥露布此擬題之始歟

唐劔南西川節度使同中書門下平章事破吐

蕃露布

臣聞天討有罪兵應者勝義者王人謀而成師直為壯

曲為老多助之至四極爰轡正觀則同羅擊延陀開元
則九姓殄默啜曰商莫不米享犯漢雖遠必誅德風翔
乎河源武節憺乎月窟率寧人之有指先元戎之啟行
用信威光祖宗不以賊遺君父恭惟宣昭義問救寧武
功纘八葉之鴻圖奮四征之雄畧懷梟鴟銷祲沴稟印
太和剪鯨鯢清郊原掃除羣穢王猷允塞我武維揚奇
幹善方各修貢職條支若木咸順指令邈積石之遐陬
有吐蕃之醜類侵敗王畧倍奸齊盟乘邊將之騁兵瞰

戎亭之虛候為蛇豕食上國盡盜河湟師蝨賊搖我疆
再驚畿甸騎塹敢於深入鑾蹕至於親屯攔然授兵協
以謀我尚納汙而含垢姑通使以結和清水之盟未乾
好時之師已聚指涇靈而徵賂闖鹽夏以擣虛夷德無
厭弗悔衽金之禍楚氛甚惡輒興裹甲之謀蠢爾為讐
整居匪茹維時南詔慕化中朝先零之質諸羌雖嘗并
力縻人之率百濮罔不離心頓顙於邊受命於吏斷匈
奴之右臂羈南粵以長纓燕貉輸致騎之勤晉戎成椅

鹿之勢彼既失鐵橋之險我遂克峨和之郛盍竄匿於
龍庠復虔劉於麟塞戕我守將墮我陴隍修戈矛與同
仇靡室家不遑處臣等請奮其旅以殲乃雙鳳翔振武
靈武之騎獵其西邠寧太原涇原之兵震其北率南服
熊羆之校暨東川貆虎之師烏蠻撓其腹心回鶻擣其
肘腋衆素飽矣一大治之諸將陳洎等統五萬軍出十
一道濟師西顓之半策勲北陸之初盪平七城斬馘萬
級獲鎧械十五萬計燔堡壘百七十餘遂鼓勇而圍昆

明將乘勝而定青海偽東境五節度大使論莽熱釋朔
方之衆援維州之城九攻九却之計窮七縱七擒之威
速連連執訊矯矯獻囚不然我薪而自焚有如破竹之
立解拂廬魚潰甌脫兔奔谷靜山空行就焉耆之僂區
殫域滅汭聞智盛之降斯皆廟謨淵深神斷天造明見
萬里運奇堂上之兵守在四夷制勝目中之虜勒功滇
池之柱植表赤嶺之碑一怒安民文之勇也三軍用命
克何力焉臣等承帝之明敵王所愾開遠門揭侯坐收

西極之舊封紫微殿受俘重覩崑邱之茂績

西山先生曰露布貴

奮發雄壯少靡無害不然則與賀勝捷表無異矣

檄

漢丞相諭告巴蜀檄

漢元年夏四月丞相何諭告巴蜀郡縣蓋聞天之所助者順民罔常懷懷於有仁秦失其正豪俊靡沸雲擾磨牙而爭之惟漢王先入關扶義而西為百姓請命秋毫無所害代虐以寬若時雨降民大悅項王滅德作威為

天下宰不平反易其天明思肆其罔極義帝越在荊蠻
未有攸底漢王失職之蜀民亡不恨者項王有背約之
名天下畔之諸侯之兵四面而至夫一里之厚而動千
里之權者地利也昔秦西有漢中南有巴蜀謂之天府
沃野千里餘糧棲畝轉粟西鄉方舟而下天所以資漢
也秦三將亡尺寸功鬻其國而王之慈父孝子將接刃
以復怨及其鋒用之若奔兕之觸魯縞未足以喻其易
王已拜大將軍信決策東伐朱旗一麾三秦必從風而

靡襟山帶河四塞以為固乘列席勝人人自為戰雖有
智者不知為楚計矣項王亢不衷奸齊盟不順所遇殘
滅不仁師曲為老其彊易弱傳曰不嗜殺人者能一天
下湯武是也漢取天下可以萬全巴蜀固多奇士有從
漢者尊顯之龍起雲襄維其時矣爾父兄其率子弟比
善戮力墾留除害毋陰拱以觀其孰勝王之入關悉除
去秦法舊染污俗咸與維新縞素為資珍物無所取非
富天下也養其民以致賢人行仁政而王莫之能禦也

楚雖大何畏焉用歷告爾新造邦尚永力畋爾田寧爾
居毋蠢不靜以自速辜吏以仁誼教訓辨告勿行苛政
明聽之母忽

詞學指南云機軍也東萊呂氏曰晉侯使呂相絕秦檄
書始於此春秋之世鄭子家使執訊與書以告趙宣子
晉之邊吏責鄭王使詹伯辭於晉王子朝使告諸侯皆
未有檄之名戰國時張儀為檄告楚相其名始見魯仲
連為書約矢遺燕將秦尉它移檄蒯通說范陽令曰傳
檄而千里定韓信曰三秦可傳檄而定漢有羽檄顏
師古曰檄以木簡為書長尺二寸有急加鳥羽示速也
急就篇注檄以木為之長二尺說文亦云二尺書李左
車曰奉只尺之書自相如之後檄書見史策者不可勝
紀揚雄曰軍旅之際飛書馳檄用枚臯謂其為文敏速

也唐以前不用四六周益公擬漢河西大將軍論隗倪正父擬晉奮威將軍豫州刺史史論中原豪傑皆用四六然散文為得體如東萊漢使喻莎車諸國是也釋文曰檄激也文心雕龍曰檄皦也宣布於外皦然明白

唐河東保寧等軍行營副元帥諭晉隰慈州檄

興元元年八月某日河東保寧奉誠軍行營副元帥北平郡王燧檄告晉州要君廷珍隰州毛君朝敬慈州鄭君抗及將士吏民等蓋聞率土莫非仁盍念在三之訓明王伐不敬有嚴討貳之刑義士不求生以害仁智者能轉禍而為福其畢棄舊威與維新我國家九葉繼明


億年凝命天保以上采薇以下內撫外綏濮鉉於北祝
栗於南德澤恩溥神旌遞討窳窳咸誅堯治時雍猶有
青丘之梗舜仁天幃未除丹浦之凶李懷光奮渤海之
俘授蒲津之節始謂狙之作使不虞鷹之易飈犇命醴
泉粗展勤王之績請朝行闕輒哀犯上之謀猶念前勲
屢靡好爵張萌芽於霜露悖木水之本原升鸞之謀肆
行巢鳩之使弗返奪二軍而殲良將剽三邑而剪近畿
豕心莫悛鴉音不革已復漢京之日月載揚周旅之霆

雷幕府承命齋壇建牙列鎮正正之旗堂堂之陳莫敢
我承赫赫厥聲濯濯厥靈有征無戰渾侍中率同陝之
士韓僕射統攸寧之師唐節度虎視鄜坊駱將軍熊峙
鎮國風雲助氣草木為兵詔參伐以清氛命招誓而繕
怒不竦前茅之邁將成獨柳之誅惟爾三州之士夫夙
被累朝之德澤嶠從處仲適受逆汙遵事隗囂豈為賊
守鼎魚假息火兔阢危犯大義者衆必攜作不善者神
弗赦歷數古今所記未聞叛逆獲全惟岳阻兵汙膏齋

斧朱泚竊號亦梟藁街矧茲秋孳敢干天罰犬馬猶有
主覆載不容鯨鯢取以封脅從罔治聖上禹湯治已文
武行仁凡鳴孤假王之妖首鼠觀釁之將莫不匿瑕宥
戾除垢滌邪雖三子猶存蓬艾之間豈太陽不回葵藿
之照尚式王命共惟帝臣勿相依於輔車以俱焚於玉
石倘能洗心效順解甲來歸勩獻關東疏封帶礪融全
河石紀烈旂常若迷復怙終猶豫不斷蹈於顯戮謚為
至愚豈惟敷虐多方亦且遺臭千載請擇二者永肩一

心者定爾功復見弓橐而戈戟式化厥訓庶幾世變以風移檄到如章書不盡意

劉勰文心雕龍曰祭公謀父稱文告之辭即檄之本原戰國始稱為檄凡檄之大體或述此休明或叙彼苛虐指天時審人事算強弱角權勢標著龜於前驗垂堦鑑於已然譎詭以馳旨煒晢以騰說故植義飏辭務在剛健揮羽以示迅不可使辭緩露板以宣衆不可使義隱必事昭而理辯氣盛而辭斷此其要也冊府元龜序曰暴揚過惡張皇威武使忠義奮發而邪謀沮懷論去就之理陳逆順之狀俾之改圖易轍轉禍為福誕告士民使知不獲已而用兵非無名而黷武



四明文獻集卷三

欽定四庫全書

集部
四明文獻集卷四

詳校官庶吉士臣張溥

主事臣呂雲棟覆勘

覆校官中書臣汪師曾

校對官監丞臣張曾炳

謄錄監生臣沈成均

欽定四庫全書

四明文獻集卷四

宋 王應麟 撰

制

昭慶軍承宣使左金吾衛大將軍荆湖北路安

撫使兼知鄂州授寧武軍節度使龍神衛四

廂都指揮使夔路安撫使兼知夔州兼提領

措置屯田兼控扼瀘叙昌合四州邊面加食

邑食實封制

詞科試中第一場首選

門下建齋旄而啟鎮密聯廂部之班分閫帥以留田兼
飭邊城之備乃騰承流之雋夙參宅牧之權兵農方急
於坤維表裏載更於師律王言作命士聽無譁某官沉
毅而善謀忠純而知義臨機料敵明四種之兵書御衆
牧人備五材之將畧率先爪士屢奏膚功有嘉衛社之
勤寢服執金之職貳荊州之方面江界肅清殿鄂渚之
雄藩民心靖謐治效已聞於南紀朕衷尤軫於西陲念
蜀道之孔艱恃夔門之堅守遠連夷徼先江陽燹水之

捍防近護風寒謹昌元巴川之控禦欲整軍而經武必
徹土以侍糧惟爾之能敵王所愾是用易茗雪宣風之
秩新葭萌賜節之儀十乘以先啟行植中權之牙纛四
鄰若防制水壯列郡之喉襟繇副帥以褒升進上游而
綏撫昇端拱使名之寵總紹興穡事之綱敵可勝而奏
屯田亟上便宜之十二蠻來威而伐獫狁往陳師旅之
三千欽哉實畝以實墉予以維藩而維翰申陪采賦增
賁戎昭於戲按德裕南道之圖慨想籌邊習農之績覽

孔明平沙之陳毋忘渡瀘耕渭之規務本所以有轉輸
設險所以嚴保障祇若予訓式固爾猷可云云
主者施行

按詞學指南云唐虞至周皆曰命秦改命為制漢因之
下書有四而制書次焉其文曰制詔三公顏師古謂為
制度之命唐王言有七其二曰制書大除授用之學士
初入院試制書共三篇此試制之始制用四方以便宣
讀宋制知誥中書舍人召試中書而後
除不試號為異禮所以試者觀其敏也

特進觀文殿大學士提舉臨安府洞霄宮授少

保寧武軍節度使荆湖廣南宣撫使判潭州

軍州荆湖南路安撫大使加食邑食實封制
門下位左棘以建旄兼總宣威之任殿南邦而分圉益
隆統牧之權疇咨祕殿之英越在羣公之表倚重臣而
彊本釋真館以圖庸參錫徽章載颺顯冊某官某忱恂
而寬裕剛毅而沈潛緯武經文可大則賢人之業集思
廣益至公以天下為心亮采日嚴訏謨辰告久贊襄於
衮職遄燕佚於琳庭冠元豐寓祿之階羽儀賜位峻皇
祐宗儒之秩領哀延恩養恬雖適於雅懷應變未殫於

遠略睠武安之鉅鎮屹方面之要衝地控重湖內欲腹
心之先備疆連五嶺外如唇齒之相依銷患未形維人
無競廸思高廟有若臣綱繇舊猷而命旬宣即中權而
領藩翰徒得君重載纘武功是用篆車升亞保之班茸
纛授益昌之節兵事不由中御合楚粵以撫師戎乘以
先啟行指衡湘而植屏數路聽和門之令十連尊元帥
之稱申衍圭畬陪輸幹食以新采薇治外之畫以謹徹
桑未雨之防於戲陶侃啟長沙之封嘗督軍於交廣方

叔振中鄉之旅佇執訊於蠻荆精神折衝則國勢張指授當任則人心靖厥承猷訓懋建膚公可

寧江軍節度使左驍衛上將軍金州駐劄御前
諸軍都統制授武康軍節度使右金吾衛上
將軍興元府駐劄御前諸軍都統制加食邑
食實封制

門下錫齋旄而啟鎮載聯中尉之華總禁旅以修戎益
重西陲之寄乃睠蕃宣之偶夙殫守衛之厯䟽陟典以

褒勲更要衝而統成明賜渙號敷告師虞具官某果毅
而樸忠沈雄而肅哲營平守節深料敵之威謀驃騎抗
旌慄冠軍之森勇列武威而拱極臨涓水以乘邊王旅
嘽嘽允壯金湯之勢戎容暨暨聿張箕翼之形迪簡予
衷茂嘉乃績念漢中之保障控益部之衿喉復險要於
舊圖于疆于里峙屯營於東道維屏維藩師徒甫集而
未蘇陴壘方更而未固將飭不虞之備亡踰已試之良
是用新駱谷之建牙易夔江之留務鵬冠魚服陞峻秩

於軌金犀甲熊旂侈多儀於授鉞如乾道顯忠之並命
若紹興楊政之進屯以嚴細柳堅壁之威以恢采薇治
外之畧申加井賦增賁坤維於戲登拜將之壇決策蓋
繇於南鄭上出師之表駐軍欲定於中原惟山川未改
於昔時則事業益參於前哲典聽朕瑟式固爾猷可

趙葵特授少傅依前觀文殿大學士充醴泉觀
使冀國公加食邑食實封仍令所司擇日備

禮冊命制

咸淳元年二月三日

門下朕祇適燕謀不承鴻業佑民作君而相上帝惟懷
永圖貳公宏化而弼一人式序在位瞻言碩望首錫茂
恩晉左棘之穹班渙大廷之顯冊少保具官趙葵寬閑
而肅括俊偉而光明文武憲於萬邦有應變折衝之畧
忱恂迪於九德有庇民尊主之心出則秉斧鉞以董師
入則踐樞衡而穆綽謙謙終吉蹇蹇匪躬願從赤松進
退合於禮義非謂喬木老成重於典刑肆予紹休若古
訪落追先帝之遇諒懷欲報之忠貽哲命之初靡忘用

德之訓誕敷霈澤可後者英昔寧皇之登至尊命必大
而升亞傳有嘉雅操允蹈前聞夏篆通禮峻躋特揖祥
源使組仍冠延恩增多邑於采封衍真畬於圭食以篤
股肱之舊以昭體貌之隆於戲世服勞紀於大常夙懋
屏毗之績身雖外心在王室尚遵寅亮之謨永肩遠猷
益介純嘏可淳祐三年葵除右丞相到京言者謂宰相
須用讀書人葵知之徑出國門上表辭曰
霍光不學無術每思張詠之語以自慙
皋陶所讀何書敢以趙抃之言而自解

程元鳳特授少保依前觀文殿大學士充醴泉

觀使新安郡開國公加食邑食實封仍令所
司擇日備禮冊命制

門下仰惟前代訓官莫重貳公之任永言孝思嗣服聿
懷有佐之賢朕寅紹丕圖恪遵成憲仁霑恩洽用大賚
於善人謨明弼諧寔勩相於烈考晉班孤棘孚號明庭
特進某官程元鳳德厚而器閎學醇而識遠浩然養以
直盡責難陳善之恭休焉如有容得扶美效君之體輔
贊而藏諸用動靜不失其時謁聞藩翰之庸自適邱園

之佚訪予落止敷時繹思惟舊人知若勤所以報先帝
有嘉猷則入告罔不祇師言繫我碩儒可無異數昔孝
皇之盛際重亞保之殊榮臣浩以耆彥而叙升俊卿以
宿望而延拜茲率厥典載錫之光希寬篆車峻外朝之
特揖珍臺開館仍秘閣之隆名申陪米邑之封益衍圭
畚之寔匪惟霑渥式示褒章於戲罔以寵居成功久遂
伊尹告歸之志在厥初貽哲命無忘召公為保之規克
邁前修永綏多祉可

謝方叔特授特進依前觀文殿大學士惠國公

致仕加食邑食實封制

門下嗣德罔不在初惟忠厚為家法舊人不克遠省惟
爵齒為達尊顧予纘圖爰命施惠敬休億萬載燕及皇
天咨爾二三臣既右烈考乃睠垂車之佚誕盼錫位之
榮繹於師虞敷以渙號金紫光祿大夫具官謝方叔閔
深而肅乂忱裕而粹夷經德不回凜松柏後凋之操秉
心無競參珪璋特達之純曩宅揆以奮庸善守文而持

正仲山之明且哲以保其身孟軻之致為臣皆有所式
行願素履之吉受祉黃髮之宜澹空谷之自持藐浮雲
之何慕惟今立政稽古尚賢未遑設几以須若仁祖遇
衍之禮必有進官之寵若哲廟待絳之奠聯華一品之
階冠序羣公之表適觀故事實非上宰以不除用獎耆儒
庶幾清風之咸聳仍延恩之遽職增奉邑之新畬於戲
踐阼而問丹書朕既迪周王之訓箴國而作懿戒爾益
逾衛武之年俾壽而臧有猷則告可

方叔以琴一張丹
藥一爐獻上蓋以

舊學故也似道疑其有觀望再相意令全臺劾之以為不當誘人主為聲色之好欲謫遠郡賴呂文德以已官贖丞相之罪遂得免論者曰專權忌能賈固不能以免若閑居貢獻謝亦有以取之

嗣榮王某賜詔書不名依前皇叔太師武康寧

江軍節度使判大宗正事嗣榮王加食邑一

千戶寔封四百戶制

門下朕式叙周宗若稽漢典姬公叔父我國家禮亦宜東平詔書兼親尊敬之至睦師垣之領使眡憲靖以疏恩紫微令之華屢陳冲避前寧人有訓別議優崇敷告

治朝申加異數皇叔具官某融明而迪德寬厚而履和
文章規諫自防粹然君子之美仁義忠信樂善不以人
爵為高一命袞而紹封大宗翰而植屏勲在王室如號
叔天錫純嘏如魯邦惟孝友於兄久行葦之內睦因心
篤其慶愴棠棣之孔懷哀敬有餘禮儀既備對越清廟
在天之烈適遵阜陵後土之羹長于西臺式是百辟專
席之拜巖巖維民具瞻閱理之深謙謙以卑自牧勉從
頻巽昌稱顯庸昔天聖初褒定王之碩望越元祐際展

徐卽之茂親凡賜絲綸植隆體貌有德爵齒之重錫山
土田之多祇率徽章丕昭殊渥於戲孔子稱達孝之繼
志敬其所尊伊尹言諸父之不名是謂大順增光簡冊

燕社盤維可

按嗣榮王賜詔不名制用說施事說施曰君之所不名者四諸父臣而不名諸兄臣

而不名先王之臣臣而不名盛德之士臣而不名是也又慶元中嗣秀王賜贊拜不名鄭溥之草制云天下之達尊三德兼爵齒以俱茂人臣之不名五老與親賢而比隆公羊傳註禮於君臣不名者五諸父兄不名上大夫不名盛德之士不名老臣不名二說相須詞臣兼用之可謂博矣

嗣榮王進封福王主榮王祀事加食邑一千戶

食寔封四百戶仍令所司擇日備禮冊命制
門下朕紹天駿命若昔鴻猷建令德以屏周昭備物之
典策封近親而輔漢開大國之土疆惟時叔父之尊峻
極帝師之貴名位宜加於異數山川尤襲於舊邦長樂
慈謙謂褒崇之未稱先王篤愛豈冲眇之敢忘進爵分
圭涓辰渙綽皇叔太師與芮秉心寬裕迪性高明赤烏
之德碩膚樂善不倦綠竹之文瑟僖大盈若冲閱理義
以既多服儉恭而惟一羽翼聖考表儀天支韡韡棣華

之和振振麟趾之厚肆予承序立敬在初康叔之屬獨
尊助茲宅命東平之恩莫比詔以勿名載錫寵光未隆
體貌何以適追於先志蓋嘗參繹於前規仁祖優定卹
之賢更封於鎮哲廟殊曹國之睠賜履於荆皆由下武
之孝思推為行葦之內睦率循彝憲可後徽章是用琢
金璽而胙真田燾赤社以介景福三山寰宇徽號肇新
雙節齋壇多儀維舊寅念寢園之奉具嚴烝祫之修盛
德百世祀虞丕行統承之慶眉壽千歲保魯茂迎昌熾

之休仍董正於宗盟併豐倍於采邑於戲九經尊位以重祿必先諸父之親萬年惟王永民尚式庶邦之典與

宋無極純嘏是常可

榮王度宗生父理宗弟德祐元年議建藩屏以強王室闕紹興府剡

東安撫大使置長史司馬後從幼主入覲封平原郡公

呂文德依前少保寧武保康軍節度使京湖安

撫制置大使屯田大使兼四川策應大使兼

荆鄂州軍州事兼管內勸農營田使兼侍衛

馬軍都指揮使霍丘郡開國公加食邑七百

戶食實封三百戶

門下朕祇承景命懋敬肇禋定郊祀而允集壇藉正月
於漢典見宗祖而躬執禮參元日於唐儀乾度昭清坤
儀肅穆聞金支羽林之樂時則興輦鼓之思觀玉路宸
旂之容時則念旂常之績既輯欽柴之況趣申位棘之
褒揚於昕庭敷我餽澤具官某器資閱毅志槩忠純來
旬來宣而告成協濟攘夷之略有嚴有翼而共武屢書
敵愾之勲乃兼雙節之榮乃踐貳公之列討軍實而申

儆克壯其猷未陰雨而綢繆以固吾圉朕惟除戎斯致
孝享治外可告神明幸甘泉祖夕烽之虞而參旗馳月
捷之奏蓋以本強於荆土用能表拓於蜀疆於救圖功
其綏多福茲庸加勞而賜胙亦如相祀之執燔爰賦增
封真奮衍食於戲覲羣牧而班瑞朕率循肆類之初敏
戎公而錫田爾尚迪對揚之祉益恢茂烈永乂嘉師可
文德帥蜀嘗復瀘州及在襄陽
壞於玉帶利之害人如是哉

楊淑妃制

門下朕祇率邦彛適修內治周南之得淑女正王化而
厚人倫唐典之建列妃贊后職而論婦禮寅奉慈宸之
訓爰登世閥之華颺於昕朝示我德選美人楊氏凝姿
敏惠迪性柔嘉圖史有聞鍾襲紫傳龜之慶言容可度
蹈佩環鳴玉之和展如法相之良溫其內則之嫵惟朕
飭已以敬齊家在初睠葛覃樛木之詩本原既正凡茝
若蘭林之列位號靡充妙簡壺儀晉聯宮秩恪助思齊
之至養式孚長樂之徽言謂象著四星盍仰模於乾緯

而教行九御疇協輔於坤闈載錫茂恩用光懿範名超
賢德榮參榆翟之衣品眡公台絢采金章之綬惟時異
數若昔令猷於戲王假有家天被爾祿朕怡愉而后佐
餽爾其承視膳之恭朕節約而后親蠶爾其戒曳衣之
侈朝夕有無私之志夙夜有相戒之心益衍祉於紫庭
永流芳於彤管可特進封淑妃

淑妃楊氏也二王並廣
登極妃稱皇太后聽政

時庶事踈略楊氏與羣臣語猶自稱奴崖山既敗楊氏
聞帝崩大慟曰我恐死艱關至此者正謂趙家一塊肉
耳今無望矣遂赴海
死張世傑葬之海濱

王燭依前少保特授平章軍國重事一月兩赴
經筵五日一朝仍赴都堂議事加食邑食實
封制

門下尊賢敬大臣莫重乎老成典刑之望治國平天下
莫先乎內外修攘之規矐予宅揆之英允有經邦之略
二人同心之助方共濟於多艱一日萬幾之繁不欲勞
以細務優加異數孚告明庭具官某清任而和剛大以
直守文持正至公以天下為心尊主庇民可久則賢人

之德行藏繫善類之消長出處關時運之盛衰惟上帝
賚予爰立作相惟舊人遠省惠然肯來定大計如砥柱
之不移折姦萌若元龜之先見改紀其政適求厥寧道
德成乎安疆國勢復振將相和則豫附人心寔回以救
圖功不應徯志蹇蹇匪躬之故允惟房杜之濟謀休休
其心有容乃效臯夔之相遜朕若稽元祐圖任宿儒一
老時游廟堂咨以大政二相並秉鈞軸協於同寅祇率
彝章參建碩輔特崇耆父之禮俾居勞佚之間舉其宏

綱維天保采薇之治詢茲黃髮有訪落小莩之謀入開
導於經闡間從容於朝著圭臬申錫體貌益隆於戲万
叔克壯其猷朕庶幾復古之績伊尹自任以重卿勿替
格天之忠壽俊在位則外患消訐謨定命則治本立懋
乃一德登於不平可

爚既為平章以為二相宜一人督師臣雖無能為若效死封疆亦不

敢辭宜中事多專決不關白於爚及張世傑敗焦山爚謂國勢尚堪幾敗乞罷平章宜中徑去乃罷爚平章軍國重事以少保觀文殿學士充醴泉觀使是歲卒爚清修剛正不阿累疏乞正賞罪國勢危亡不能協謀以濟大事士論惜之

陳宜中特授右丞相依前兼樞密使都督諸路
軍馬加食邑食實封制

門下朕思濟多艱疇咨碩望惟尹躬有一德右厥辟而
宅師惟說命總百官置諸左而納誨嘉乃經綸之學弼
予寧敕之功無競維人倚同心之輔政式序在位協鼎
足之承君延拜元台誕敷坦制某官德秉乎洪毅識造
乎高明知仁勇之資治國家而有裕剛大直之氣塞天
地以無疑簡在先王俾輔後嗣贊雷厲風飛之決宗廟

再安開否消泰長之機紀綱一正定衆志於綴旂之際
回治象於驚濤之衝精神強而英雋聚朝指揮當而將
士用命忠貫皦日未嘗言房杜之功計安生民將欲復
文武之治迺若休休有容之度藹然濟濟相率之風蓋
開忱布公之心猶恐無助而應變守文之美其惟協恭
若昔元祐之隆登庸成德之彥閔勞大事咨重事之謀
儀圖真儒冠上相之任祇適先憲增光前聞六月薄伐
而飭戎車仍領督軍之寄千里決勝而運籌帷幄嚴基

命之謨以尊冢宰掌邦治之權以懋百揆熙帝載之績
申陪邑采不聳巖瞻於戲四方既平時靡有爭朕正倚
修攘之略三后協心同底於道卿益恢康濟之猷惟時
惟幾以迓天休惟和惟一以凝國是保大定功而干戈
戢更化善治而福祿來義我受民欽若成烈可似道出督以宜
中受卵翼之恩且柔順易制委以國賁敗宜中首劾賈罪以自解

留夢炎特授宣奉大夫右丞相兼樞密使都督

諸路軍馬加食邑食實封制

門下選衆而舉臯陶有虞所以凝庶績相右而命名奭
成周所以保受民迪思先皇敷遺哲輔運籌決勝惟簡
在上帝心宅揆奮庸其懿我成功所告爾多士揚於大
廷具官某學醇而識閎德厚而才裕尊王秉禮之大義
深於春秋救時行道之精忠貫乎日月以少雙寡二之
望為特立獨行之儒精神折衝兼文武之畧夙夜基宥
冠樞機之謀允具瞻之素孚謂誕登其已晚棟隆不撓
碩果猶存南國是式作爾庸懋乃攸績王事靡盬不遑

處扞我於艱欲經營四方以平夷用獎率三軍而興漢
維萬民徯司馬之入而上宰遜王曾之來豈煩勸誦於
經惟咸望協熙於帝載矧今天變未弭國步未寧明黜
陟所以制治保邦修政事所以攘夷復竟爰立作相於
救圖功元祐並命三賢若純仁之躋次輔紹興總提二
枋若臣浚之督成師陟序崇階衍賦多邑庶幾真儒無
敵之效丕展良弼輔德之謨於戲待裴度而開延英時
惟舊人圖任濟房喬而斷大事尚冀乃僚同心三后協

可以澤生民衆正開可以杜羣枉指授當任則邊氛靜
處置得宜則國勢強式固爾猷克邁乃訓可

夢炎自狀元至宰相

在位不克振修攘之烈給舍言其外令懷諫今之敗降者皆其任用之士遂棄去宋亡入見京師規求進用謝昌之薦之降吏部尚書至翰林承旨世祖嘗曰夢炎位至宰相賈似道懷諭誤國不能救葉李布衣乃能伏闕乞斬似道命趙孟頫為詩以譏之孟頫曰狀元曾受宋家恩國困臣強不盡言往事已非那可說且將忠赤報元皇

葉夢鼎特授充醴泉觀使兼侍讀依前少傅觀

文殿大學士信國公食邑食實封如故制

門下朕更張初政率籲宿儒詢黃髮則罔愆閔勞宅牧
之事學古訓乃有獲延登勸誦之聯惟尊德樂道以有
為庶遺大投艱其求濟勉從巽牘誕布渙綸具官某剛
大而粹明忱悃而閎裕海濱大老慄廉頑立懦之風天
下達尊懋輔世長民之德碩果表於羣彥靈光歸乎三
朝責難謂恭陳堯舜之正道不可則止恥由求之具臣
肆予改絃申命賜履望公如望歲允有甘棠之思治民
如治家丕徯黍苗之澤以楚丘之謀始壯而東山之志

不渝股肱力汝為不欲煩於方面者壽俊在服其進疆
於本朝念冲人道問學之初維大臣傳德義之益紹興
舊弼冠延恩之職而敷經淳熙耆英領祥源之使而詔
讀若稽茂典載錫優章肯從我游克邁乃訓於戲問丹
書之敬義毋勤師尚父表海之行瞻綠竹之琢磨尚迪
衛武公箴國之戒有謀則就盍歸乎來可賈似道專政
夢鼎不得行
其志利州轉運使王玠子懇求遺澤夢鼎以為合與似
道以恩不出已罷吏數人夢鼎曰我斷不為陳自強即
求去似道毋責似道曰葉丞相安於家食汝強與之相
印今乃牽制若此不從吾言吾不食矣似道曰為官不

得不如此乃使人謝夢鼎
夢鼎乃已後奉祠家居

夏貴特授兩淮宣撫大使知揚州依前開府儀
同三司寧武軍節度使左金吾衛上將軍樞
密副使兼侍衛馬軍都指揮使食邑食實封
如故制

門下聽鼓鼙思帥臣倚一賢而強本戒師旅率淮浦兼
兩路以宣威朕逢時隱憂注意宿望授西討之畧方屢
奏於膚公先元戎之行趣往臨於鉅鹿王言作命士聽

無譁具官某良寔而忠純沈潛而果毅屬大事可當一面雖草木莫不知名方畧無踰老成樽俎足以却敵有厭難折衝之壯志有憂國愛民之盛心慨王事之棘則夜夜而行憤狄難之熾則纓冠而往風聲鶴唳策淝水之奇勲士飽馬騰占郾城之勝氣貳樞列於西輔儀台眎乎三公維元老之方叔以飭師千維黃髮之尚父以秉旄鉞戎容暨暨趣咨籌幄之謀淮水湯湯尤重廣陵之鎮念閫寄分任則氣勢弱必事權合一則臂指從欲

表裏撐拓之得宜庶首尾運掉之相應昔高廟之復古
命世忠而捍城茲宏建於使名俾留攘於外侮陝東西
盡護於諸將江南北嚴守於要衝蔽遮旬畿控禦都會
式固吾圉亟為朕行於戲來旬來宣告成於王既任召
虎平夷之寄有嚴有翼共武之服益懋吉甫憲邦之功
威信孚可以輯人和號令明可以作士氣適圖耆定汜
濟多艱可此在陽羅堡喪師之後貴既失長江惟恐督
府有戒罪無所逃又恐孫虎臣以後進為將
有功總統出已上日夜幸其敗督府既清貴歸廬州屢
詔不出若罔聞知國亡乃以淮西聖竟歸附以為已功

世祖俾為平章後四年卒將葬僧祝之曰今年八十四何不七十九白骨葬青山萬古名不朽

孫虎臣特授清遠軍節度使加食邑食實封制門下朕注意戎昭疚懷邊瑣賜諸侯弓鉞用進律於有功建大將鼓旗爰設壇而具禮告爾多士揚於明廷具官某志槩忠純器資雄毅有禦侮折衝之畧援桴鼓則忘身有牧人禦衆之才執干戈而衛社式固吾圉屢奏膚公擊節誓中原之清矯矯冠軍之勇鳴劒馳伊吾之志洸洸敵愾之勲憤強敵之憑陵率熊羆而攘却表撐

裏拓嚴保障於海陵左弭右韃懾威稜於江潯庶幾報
彭衙之役豈止復鴈門之蹠淮浦修我我倚招撫而討
叛師中承天寵豈懋賞以陟明膺將軍跪轂之榮錫融
水齋旄之命增封多衍食邑真畬以旌細柳堅壁之勤
以恢采薇治外之績於戲邊境功名在良將朕惟獎勵
於忠忱兵事節度皆付公爾亟肅清於氛祲祇若茲訓
扞我於艱可

此在燕湖
敗師之後

張世傑特授保康軍節度使左金吾衛上將軍

浙西制置副使兼知平江府仍舊帶行樞密
都承旨揚州駐劄御前諸軍都統行樞督府
總統一應軍馬加食邑食寔封制

門下千里之內曰畿莫重乎根本之地十里為連有帥
莫嚴乎弓鉞之權惟予冲人未堪多難出車王事棘矣
孰或過於要衝跪轂將軍制之爰疇咨於宿望建淑旂
而分閫敷明綍以揚庭某官雄毅而沉潛忠良而篤實
帷幄決予房之勝方略運於殲鈐草木知萬福之名威

稜憺於邊境矯矯冠軍之勇惓惓衛上之忱修戈矛與
同仇志殄殲於強敵儆師徒討亂畧躬獎率於顏行愾
綴旂之貼危首投袂而入援執訊獲醜采薇之捷屢書
披霧清氛前茅之氣大振再念吳門之危急嘗勞師律
之蓄攘却敵賢於長城徵卿民其左衽今堂奧之寇寢
迫而藩籬之重當嚴稽中興名將之成規膺右溯制垣
之重寄謹固保障則常潤可復迅掃妖祲則京師以寧
克壯其猷用錫爾祉齋壇授鉞領巨鎮於房陵吾臣司

金盛戎容於緹騎以危難之間受任以節度之事付公
兼昇牧守之榮益彊屏翰之勢衍其采邑明我茂恩於
戲地利不如人和朕適求於多助武服以定王國爾趨
奏於膚公三軍同力以收復宇之勲衆心成城以集安
民之績俾金湯之不聳永帶礪之有光可

世傑信安歸
正人時京我

內空賴一軍萬人自荆湖入衛二王航海也傑扈駕由
定海趨三山唐王登極拜少保圍泉州峻都救兵至遂
解圍去衛王即位拜太傅戰於崖山敗績奉楊太后以
小舟奔取辦香仰天呼曰我今為趙氏亦已至矣一君
亡復立一君今又亡我奉皇太后走者庶幾別立趙
氏立之以存趙祀若天不欲之則大風覆我舟遂覆

高達特授少保依前寧江軍節度使左金吾衛
上將軍荆湖北路制置副使兼安撫使馬步
軍都總管兼知江陵軍府事兼管內勸農營
田使節制本府屯戍軍馬固始郡開國公加
食邑食寔封制

門下朕倚重上游圖寧多難命率以衛中國佇聞執訊
之勲式公而弼一人允迪保邦之訓疇勞進律孚號揚
庭某雄深而尚謀福艾而持重庶頗為將豈憂匈奴哉

充國撫民無踰老臣矣名著硯山之草木計安鄂渚之
金湯慨彼相之忌功不能蚤服迨我圉之孔棘未嘗辭
難命以江滸告成於王鎮於荊州用武之國憤蝨賊搖
我疆之慘投鞭斷流恃熊羆不二心之忠若防制水元
戎十乘以禦侮於危急二矛重弓以協力於旬宣維樞
臣趣勤王之行而聞寄專守圉之任東連吳西連蜀爾
為長城卯受詔辰出師爾紹前烈徯采薇三捷之奏膺
位棘亞保之班在昔世忠暨於張俊皆自儀同而序陟

用勸殊庸今以校聯而真除時維茂渥蓋注意隆則恩
必厚錫寵優則功可期衍食真畬增光齊鉞於戲嘽嘽
戎車方叔率止朕有嘉克壯之猷烈烈征師召伯成之

爾尚集既平之績祇承異數懋建膚公可

達荆湖名將
鄂州之圍高

達帥諸將力戰似道自漢陽至鄂督師達恃其武勇殊
易似道每見其督戰即戲之曰魏中者何能為哉將戰
必須似道親勞士始出否則使軍士譁於門似道由是
銜之許其建節而不予達怨望久矣及達制置江陵遂
以城降於元命朱禕孫徽京湖北路於是歸峽鄂復鼎
澧辰沅靖常德荆門相繼降禕孫至上都死今觀高達
擬制稱依前武康軍節度豈已嘗建節故耶或將建節
以降故不克用耶中言慨彼相之忌功不能早用則賈

相忌功之罪
不可掩矣

祭文 內制

九虞祭

第一虞 至六虞太常卿行禮

相攸禹會穆卜漢陵弓劍既藏美牆如見祭初易奠永
極哀號

第二虞

靡瞻匪父莫親栢隧之臨速反而虞無復敢輒之見安

於仍凡申以貳觴

第三虞

仙馭邈然如望弗至神旆歸止不顯亦臨罔極一哀有
嚴三祭

第四虞

虞凡安行愴駒陰之信宿容衣如在杳龍駕之空濛薦
禮四陳哀悰九折

第五虞

濟江東邁永懷復土之哀
娶衛西歸五展寧神之祭
未縣躬薦深切心摧

第六虞

穆陵告備想先烈之如存
清廟揭虔佇靈旂之來拊
將親几奠永切弓號

第七虞

皇帝親行禮

因山既備心如慕以如疑
作主是依神來寧而來宴
始親薦奠罔極哀摧

第八虞

皇帝親行禮

率時昭考尚思憑几之言瞻彼昊天如見虞觴之奉薦
儀將畢哀素無窮

第九虞

皇帝親行禮

千秋永穆之陵獻儀已闕萬世理宗之廟祔禮將行奄
進終虞曷勝追慕

遣守臣奏告南嶽

巖巖喬嶽奠於南邦仁義所鍾佑民儲社醜虜不道逆



天犯順江漢之域荼毒橫流爰及長沙氛祲益熾兵民
堅守保障不搖助順惟天降福惟神潔恍精祈庶克者
定威靈有赫電掃凶醜師直為壯亟奏膚公萬里長江
咸復舊守湘水清謐用乂我民於萬斯年永錫純嘏

奏告滁州端命殿太祖皇帝神御

皇祖造邦以仁興武清流丕績駿命造基揚虔妥靈輝
赫萬世敵為蛇豕薦食無厭維此滁城式固封守威神
在上寔任綏之虜梗饒道疆圉孔棘分命籲告徼福祖

烈為民請命殄殲凶醜迅掃賊壘耆定武功江漢謚清
永又區夏

祭濟王文

皇帝遣具位王應麟致祭於皇伯祖故少保保靜鎮潼
軍節度使濟王贈太師尚書令追封鎮昭肅王之墓唯
我理祖因心則友則友惟兄惟王令德孝恭為宋泰伯
權臣顓政追感王於淮南之寃九原鬱憤踰五十載理
宗篤叙天倫哀念不忘端平更化亟命復爵維繼絕崇

贈之典以待後人度考踐阼首敘追復之詔肆惟冲人
繼志存恪今強敵憑陵國步孔棘氛祲迫於雲川夙夜
兢兢思所以回上天悔禍之意用仰成祖宗厚睦之心
贈王師垣端揆進封大國錫以令謚命太宗正選宗屬
為王後賜田萬畝俾奉烝嘗仍戒有司修崇王墓英魂
如在歆我卹章默相陰祐亟殄強敵扶持宗社保乂生
民祖宗在天寔寵嘉之王之春秋享祀亦永永無斁王
湖州山水惡絕蓋當時權臣為之昔朱全忠降昭宣帝
為濟陰王濟卹之封取濟水獨絕之義又蕭衍篡齊降

和帝為巴陵王而齊王亦降封巴陵公用心如此亦可謂無忌憚矣夫巴陵之變踰五十年羣臣以濟邸為言者皆斥去及大兵壓境繼絕崇祀之典始克為之踰年社稷為墟矣春秋祭祀之不享豈獨王哉袁文清公曰吳夫人復封端平之初也復立濟祀德祐之末也馴至於此其可言哉

祝詞 內制

仲秋潮汛吳山忠清廟設醮祝詞

神甸襟江萃民居之浩穰潮靈從月應秋皇以奔騰維金堤捷石之方增慮銀屋駕濤之莫禦匪依洪覆曷即敕功被飭真科吉主芳薦願賜穆清之鑒申敕

濛鴻之祇海不波揚誕登年而汔濟天無風烈究安宅以咸寧

樂章

曾參孔伋配食大成樂章

酌獻曾參邠國公

心傳忠恕一以貫之爰述太學萬世訓彞惠我光明尊聞行知繼聖廸後是饗是宜

酌獻孔伋沂國公

公傳自曾孟傳自公有的緒承允得真宗提綱開縉乃

作中庸佑於元聖億載是宗

宋咸淳三年度宗幸太學
詔升曾參鄒國公孔伋沂

國公配享先聖孔子廟廷昔厚齋公權直學士院樂章
寔其撰著宋亡元世祖詔定先聖先師釋奠儀其鄒沂
二國公遵而用之遍及天下迨將百年而莫有知出于
公手云者固宜表而出之世祚既移郡邑庠序俎豆之
事為之暫輟後有舉而行者不知復能用公之文被
之弦歌以昭格享之寔否乎觀於此者感慨係之矣

咸淳元年正月臣應麟以著作佐郎暫攝閏五月

兼翰林權直二年正月為軍器少監陞學士院權

直三年三月以將作監陞權直學士院德祐元年

三月除中書舍人兼直學士院四月入院前後再
入北門凡四年咸淳元二間及德祐之元多獨直
云臣應麟謹識

制誥之來尚矣自晉開運元年詔翰林學士與
中書舍人分為兩制有唐號為全備至宋而猶
盛文章之士極天下之選然後用之任不亦重
乎故事翰林書詔付門下者為內制而以中書
行詞者為外制凡大冊命鎖院則命內侍於學

士私第傳旨執仗者異常服呼嗒以俟勞以酒
饌然後上馬傳呼夾道行者辟易既至宦者迓
以入制成翌日黎明捧金盤進御以金刷印可
既宣讀乃謝恩受賜而歸吁其不榮矣乎哉故
翰林學士厚齋王公嘗三入北門咸淳德祐初
多獨直且兼掌西掖詞命一時宣鎖多屬之至
於獎予批答之辭詞疏冊祝之禮紛紜雜還晝
夜不停蓋自有宋以來其敏捷如公者可數矣

今即其詞而觀之激厲奮發足以感泣三軍勤
拳諄復足以警惕百揆誠敬惻怛於以感格神
明淵深博洽於以色絡今古方且一詞之出土
大夫傳寫殆遍綸言以蘇軾比之孰謂宋祚將
亡而有斯人也耶書曰俾萬姓咸大王言其公
之謂乎後學滎陽生鄭真再拜謹識

四明文獻集卷四